

Šefket Arslanagić (Mostar)


TORIČELIJEVA TAČKA U TROUGLU



Za italijanskog matematičara Evangelista Toričelija (E. Torricelli, 1608 – 1647) znamo uglavnom iz fizike. Pominjali smo ga kao pronalazača živinog barometra (Toričelijeva cijev) i zakona o djelovanju atmosferskog pritiska na živu, brzine isticanja vode iz suda, itd. Bio je saradnik i sekretar slavnog Galilea Galileja (1564–1642). No, on se bavio uveliko i matematikom. Evo jednog vrlo interesantnog zadatka koji je izučavao Toričeli:

Nad svakom stranicom jednog trougla ABC konstruisani su jednakostranični trouglovi ABC_1 , BCA_1 i ACB_1 i vrhovi A_1 , B_1 i C_1 spojeni su redom sa vrhovima A , B i C (sl. 1) Dokazati:

- 1) da su duži AA_1 , BB_1 i CC_1 međusobno jednake;
- 2) da kružnice opisane oko konstruisanih jednakostraničnih trouglova (Toričelijeve kružnice) imaju zajednički presjek u tački O (Toričelijevoj tački);
- 3) da se i duži AA_1 , BB_1 i CC_1 sijeku u tački O .



Sl. 1.

Dokaz.

1. Trouglovi BB_1C i AA_1C su podudarni, jer su im po dvije stranice i zahvaćeni uglovi jednaki, tj.: $B_1C=AC$, $BC=A_1C$ i $\sphericalangle BCB_1 = \sphericalangle ACA_1 = \sphericalangle C + 60^\circ$.

Iz podudarnosti ovih trouglova slijedi da je $BB_1=AA_1$.

Na isti način se dokazuje da je: $BB_1=CC_1$, pa je najzad $AA_1=BB_1=CC_1$.

2. Neka se kružnice opisane oko jednakostraničnih trouglova ACB_1 i BCA_1 sijeku u tački O .

Uočavamo da je ugao $\sphericalangle AOC = \sphericalangle BOC = 120^\circ$, kao suplementni uglovima kod vrhova B_1 i A_1 čija je veličina 60° . (Četvorougli $AOCB_1$ i $BOCA_1$ su tetivni, a za njih važi teorema da su im suprotni uglovi suplementni.). Prema tome je i $\sphericalangle AOB = 120^\circ$, tj. i četvorougao $AOBC_1$ je tetivan i kružnica opisana oko jednakostraničnog trougla ABC_1 prolazi kroz tačku O , presjek prve dvije kružnice.

Uočava se da se svaka stranica $\triangle AOB$ vidi iz tačke O pod uglom koji iznosi 120° .

3. Spojimo tačku O sa svih šest vrhova. Da bismo dokazali ovaj dio teoreme, dovoljno je dokazati da duži OB_1 i OB leže na jednoj pravoj.

Svaki ugao čiji je vrh u tački O iznosi 60° , jer leži nad lukom koji je trećina kružnice. (Npr., $\sphericalangle A_1OB = \sphericalangle A_1CB = 60^\circ$, te $\sphericalangle B_1OC = \sphericalangle B_1AC = 60^\circ$ i $\sphericalangle A_1OC = \sphericalangle A_1BC = 60^\circ$.) Zbir uglova $\sphericalangle B_1OC$, $\sphericalangle COA_1$ i $\sphericalangle A_1OB$ je, dakle, 180° ; prema tome duži OB_1 i OB leže na jednoj pravoj.

Zadaci

1. Izvesti dokaz ove teoreme i kada su jednakostranični trouglovi konstruisani ne sa spoljašnje, nego sa unutrašnje strane trougla ABC .

2. Dokazati da teorema važi i u slučaju ako se nad svakom stranicom trougla ABC sa spoljašnje strane konstruišu slični trouglovi tako da obližnji uglovi uglu C budu jednaki uglu B , obližnji uglovi uglu A budu jednaki uglu C i obližnji uglovi uglu B budu jednaki uglu A .

3. Dokazati da Toričelijeva tačka O u odnosu na $\triangle ABC$ ima tu osobinu da je suma njenih rastojanja od vrhova trougla najmanja, tj. da je $OA+OB+OC = \min.$ u poređenju sa ma kojom drugom tačkom koja leži unutar toga trougla.